

# Puas hati hasil kerja JKR



Ahmad Yunus (dua, kiri), sedang mendengar penerangan ketika sesi lawatan di kawasan Adun Dusun Tua, Razaly Hassan (dua, kanan).

**SHAH ALAM** - Exco Belia dan Sukan, Infrastruktur dan Kemudahan Awam, Dr. Ahmad Yunus berpuas hati dengan hasil lawatan kerja pada 21 Januari lalu yang dilakukan dan meminta pihak Jabatan Kerja Raya (JKR) serta Jabatan Pengairan dan Saliran (JPS) Hulu Langat menyelaras kerja sebaik mungkin dan memaklumkan perkembangan secara kerap.

Sebelum ini, terdapat aduan berlaku kelewatan projek Tebatan Banjir Sungai Sireh, masalah cerun runtuh dan jalan terputus di Sungai Lalang, masalah cerun runtuh di Jalan

Sungai Tekali dan masalah monsoon drain di Taman Seri Nanding.

"Tujuan lawatan ini adalah bagi mendapat maklumat terperinci daripada pihak bertanggungjawab dan memastikan projek berjalan dengan lancar," katanya dalam satu kenyataan, semalam.

Projek yang bermula sejak Jun 2012 ini merupakan kerjasama di antara JPS di bawah seliaan JKR Hulu Langat.

"Tapi, berlaku sedikit kelewatan projek disebabkan masalah pengambilan tanah oleh pihak JPB, masalah pengalihan utiliti yang lewat serta

kontraktor tarik diri," katanya.

Menurutnya, bagi masalah tanah runtuh di Jalan Sungai Tekali, kerja sudah siap dilaksanakan dan pihak JKR kini sedang dalam proses penilaian sebut harga pembaikan cerun runtuh yang kini hanya ditutup dengan heavy duty canvas.

"Pihak JKR juga ketika ini masih menunggu waran peruntukan bagi mengeluarkan inden tawaran kerja," katanya.

Turut hadir Adun Dusun Tua, Razaly Hassan; Ahli Parlimen Hulu Langat, Che Rosli Che Mat dan Pengarah JKR Selangor, Datuk Ir. Hamizan Mohd Inzan.